



TUSI 'AU LEOLEO

2019



Ia Tatou Tatalo

EKALEZIA FAAPOTOPOTOGA KERISIANO SAMOA

UPU TOMUA

E avatu pea i le Leoleo Sili ma le Lelei le viiga ma le faafetai, aua o Iona Alofa ma lana Pule faasoifua, ua ae manumalo ai le tatou faigamalaga, mai faigata ma puapuaga o le tausaga ua tuanai, ma taitai mai ai ma le manuia lo tou soifua ma so matou ola, i le amataga o lenei tausaga fou.

O le **“Ia Tatou Tatalo 2019”**, na saunia e le Susuga i le Faafeagaiga ia Siaosi Sasulu, o le Matagaluega a Apia i Sasae Ianuari ia Iuni. Iulai, Susuga Uili Konelio (Faasaleleaga), ole Failautusi foilea o lenei komiti tautua a le Ekalesia. Aokuso, Susuga Sileli Tauaifaiga. Setema, Susuga Pati Vili (Lotofaga Lepa ma Aleipata). Oketopa, Susuga Avele Utumapu (Aana). Novema, Susuga Faasalafa Vitaoa (Apia i Sasae). Tesema, Susuga Ionatana Tupolo (Faasaleleaga).

E faamauina le agaga faafetai tele i Susuga i Faafeagaiga, ona o lenei galuega taua e fesoasoani e fai ma faasino ala, ile soifua tatalo o le Ekalesia aoao i luma o le Leoleo Silisili, aua le lau sasaina mai o ana faamanuiaga, e manuia uma ai a tatou feau ma galuega.

Ia faatasi mai pea le Alii o nonogamanu uma lava, ile tatou folauga ma le faigamalaga, ma ia tatou tatalo pea.

Sileli Tauaifaiga FS.

EFKS Fagamalo Matagaluega Itu o Tane.

Sui Peresetene.

Komiti Au Leoleo.

Ianuari 06 - 12 2019.

Tusi Faitau: Ruta I: 6 – 18.
Manatu Autu: Malaga faatasi ma le faamoemoe.

Fa'afetai.

Ona o lenei tausaga fou ua aulia mai.

Ona o le galuega alofa a le Atua, e ala ia Iesu Keriso lona Alo pele ma lo tatou Alii Faaola, o se feau taua tele lea ma le aoga, e toe fafaguina ai o tatou olaga, ina ia tatou auauna pea ma le faamaoni.

Ona e le mafai ona tatou ola, e aunoa ma se faamoemoe.

Fa'atoeseaga.

Ona o lo tatou ola faatalalē i lenei lalolagi, e aunoa ma se faamoemoe e fai ma manulauti, o lo tatou ola i le lumanai.

Ona e ui lava ina anoanoai mea sese sa tatou faia i aso ua mavae, ae sa le mafai ona aoaoina i tatou ina ia fultua ile leaga, ae faasaga i le lelei tatou te manuia ai.

Ona ua faigofie ona tatou tulimata'iina se faamoemoe, ua talitonu o se fuafuaga aupito sa'o lea, e aunoa ma so tatou iloaina ole a pa'u atu ai tatou i le leaga.

Mana'oga.

Ina ia galue mai le Agaga o le Atua, e mafai ai ona tatou faagalo lo tatou toilalo o aso ua mavae.

Ina ia tatou lagona uma le olioli ma le faatuatua, atoa male loto maualalo, ua aoaoina ai i tatou e Keriso.

Ina ia faatupuina e leAlii le alofa moni i o tatou loto, ma foai mai le poto e manino ai la tatou vaai, i faamoemoega fou ua saunia e Iesu Keriso.

Ina ia taitai ma faamanuia mai le Atua ia te i tatou uma, i lenei tausaga fou 2019.

Ianuari 13 – 19 2019.

Tusi Faitau: Kolose 3: 13 – 17.
Manatu Autu: Ia nofo fealofani tagata uma.

Fa’afetai.

Ona o se faamanatu autu taua telefoi mo i tatou, ina ia tatou filifili i le faatuatua i le Atua, ae leo le filifili i le oa ma le tamaoaiga, aua e i’u vale.

Ona o le toe poloaiga foi lenei a Iesu i lona ausoo, ia ola fealofani.

Ona na afua mai i augatama o le Tusi Paia, faataitaiga lelei na Ia finagalo ai, ina ia ola fealofani ma fetausiai lana fanau, ma o le ala foi lea e faigofie ai ma saogalemu, le tatou faigamalaga o lenei tausaga.

Fa’atoesea.

Ona o le ola le fetausiai ole pine faamau lava lea, ole le faamaoni o lo tatou alofa i le Alii ma lana Ekalesia.

Ona ua faamuamua le faamalieina oo tatou manaoga faaletagata, ae faamulimuli i latou o loo fia maua se fesoasoani.

Ona ole le atagia o ona fofoga agalelei i lo tatou ola, ua tatou leiloa ai ona alolofa ma faasoa atu, e pei ona muai agalelei ma alofa mai lo tatou Alii.

Mana’oga.

Ina ia faailoa mai i ona tagata ala ole alofa moni, e maopoopo ai o tatou aiga o nuu ma ekalesia, ae tainane le malo ma le atunuu, i le amataga o le tatou folauga i lenei tausaga.

Ina ia faatonu folau pea lona Agaga Paia i o tatou tagata taitoatasi, ma faailoa mai mea tonu uma e manuia ai lana Ekalesia.

Ina ia fai pea le Agaga ole Atua, ma faasino ala i lo tatou ola, tatou te le fesea’i ai, ae faatumauiina lo tatou saogalemu.

Ianuari 20 – 26, 2019.

Tusi Faitau: Mataio 4: 12 – 17.

Manatu Autu: O le Alii e tu'u avanoa i le tagata e salamo moni.

Fa'afetai.

Ona o lona finagalo alofa e tuu avanoa mai ai pea, ina ia tatou iloa ona toe foi atu ia te Ia, i le loto salamo ma le faatuatua faamaoni.

Onao Ia lava o lo tatou olo maualuga ma le papa malosi, e tatau ona tatou faatuatua faamoemoe ma faalagolago i ai, tatou te manuia ma filemu ai.

Ona o le Alii lava e fesoasoani ma faatonu ma faasino i tatou, i le ala e ao ona tatou savavali ai ma a tatou fanau, tatou te manuia ai.

Fa'atoeseaga.

Ona a oo loa ina siomia lo tatou ola ile tele o faigata o le olaga, ona tatou lagona lea o le faavaivai, ma tupu ai le le mautonu i o tatou loto.

Ona ua tatou leiloa ona faatalitali i le musumusumu mai o le Agaga o le Alii, i taimi e osofaia ai i tatou e le fili ma ana mailei.

Ona o le tele o taimi o lo tatou ola, ua tatou leiloa ona onosai ma faapalepale, ma ua matua aafia ai lava le ola o fanau, o aiga, nuu ma ekalesia, mo le Atua ma lona finagalo paia.

Mana'oga.

Ina ia tatou faaaogaina ma le tatau le avanoa ua tatou maua, e tatala aima le faamaoni o tatou loto uma, ae faaafio tumau ai lo tatou Alii.

Ina ia silasila mai fofoga alofa o le Atua ia Samoa ma ona taitai, ina ia latou taitai ma le faamaoni ma le amiotonu, aua se manuia mo le atunuu mao tatou tagata.

Ina ia saili fofoga tagata uma i le Atua, e tusa ma le tele o faafitauli o loo aliaie mai, ua afaina ai le Talalelei ma le feau o le Faaolataga.

Ianuari 27 – Fepuari 02, 2019.

Tusi Faitau: Esoto 18: 17 – 21.

Manatu Autu: O Kerisiano manumalo e fai ma taitai.

Fa’afetai.

Ona o lona aao mafola i le tausaga ua mavae atu, ua faamalie ai o tatou manao i mea lelei, ua le gata i le itu i le tino, ae faapea foi i le itu faaleagaga.

Ona o le agalelei ma le alofa faatama o le Atua, ua taitai manuia mai ai le faigamalaga a le ekalesia ma o tatou tagata, i lenei tausaga fou.

Ona o Iseu Keriso malona soifua sasaa mai, ua faailoa mai ai le ala o le Kerisiano faamaoni.

Fa’atoeseaga.

Ona e gata lava i o tatou laugutu ma le vaaiga a tagata, le avea o i tatou ma Kerisiano faamaoni.

Ona o lo tatou teena pea o le Agaga fesoasoani o le Atua, i o tatou olaga.

Ona e ui ina faasino mai e le Atua le ala moni mo i tatou, ae tatou te fiafia pea e savavali i ala ole Tiapolo.

Mana’oga.

Ina ia alofa mai le Atua ma tautai mai i le tatou folauga o lenei tausaga, mafaamanuia mai i laasaga uma tatou te savalia, e manuia ai le malaga.

Ina ia avea pea le Keriso manumalo e fai ma Taitai, e faatonutonu folau ilo tatou sa, pe a siisii ma lukaluka peau ole vasa.

Ina ia tumau pea ma mauaa, lo tatou talitonuga ma le faatuatuaga ile Alii le Atua, e avea ai i tatou uma ma a tatou fanau, o aiga nuu ma ekalesia faapea foi le malo ma le atunuu, ma Kerisiano manumalo.

Fepuari 03 – 09 2019.

Tusi Faitau: Mataio 19: 23 – 30.
Manatu Autu: O le Atua e mafaia mea uma.

Fa’afetai.

Ona olona faailoa mai mo i tatou uma, e leai se mea e mafaia e le tagata e faamoemoe i lona malosi, ma lona lava atamai faaletagata.

Ona o lona aoao mai pea iate i tatou, o mea uma e faigata i le tatou vaai faaletagata, e faigofie atu ia te Ia ma lona alofa tunoa.

Ona a tatou faimalaga faatasi pea ma le Atua, i taimi ma aso uma e le aunoa, ona le iuvale lea o lo tatou ola.

Fa’atoesea.

Ona o le vaivai o lo tatou ola tatalo, e mafua ai ona tatou saili solo, i mea e leai se aoga o lenei olaga.

Ona o le faalotolotolua ma le femoumouai, o lo tatou loto talitonu ma faatuatua, i le silisiliese o le Atua ma lana pule aoao.

Ona ua tatou faamaualuga i le potu ma le malosi ua tatou maua, ua galo ai ia te i tatou o le Atua, o le puna o le manuia ma le ola.

Mana’oga.

Ina ia faaalua pea le paia ma le mamalu ma le silisiliese o le Atua, i mea uma e finagalo i ai, aua le manuia ma le saogalemu o tagata uma.

Ina ia avefa pea le Alii le Atua ma o tatou taitaiu sili, e tauina le taua mo i tatou i aso uma o le ola.

Ina ia tumau pea le taitaiga mana a le Atua i lana Ekalesia, e mautinoa ai le sologa lelei ma le manuia, o mea uma o lana galuega.

Fepuari 10 – 16 2019.

Tusi Faitau: Mataio 15: 1 – 7.

Manatu Autu: Ua na o le Atua e manuia ai o tatou aiga.

Faafetai.

Ona o lona alofa tunoa, na Ia laveaiina ai lona nuu mai faigata ma puapuaga, ma ua tatou aulia mai ai foi ma le manuia, lenei vaitau o le soifuaga.

Ona o le faamaoni peao lana taitaiga alofa mo i tatou, e iu lava ina tatou solomuli ma o ese mai lona finagalo paia, ile tele o taimi o lo tatou ola.

Ona o faaaoaoga sili ua Ia aumai mo i tatou, ina ia tatou ola ma savavali ai, tatou te manuia ai.

Fa'atoeseaga.

Ona ua tatou faatalalē i le faatinoga, o o tatou tiute faamatua i aiga, faataitai i totonu o nuu ma ekalesia, faapea foi ma le atunuu.

Ona ua faigofie ona aveesea lo tatou ola talitonu, ma faatuatua ile Atua, e tuinanauga faaletagata fia faamalieina.

Ona ua faamuamua e ni isi o matua ma taitai, polokalame o televise ma leitio, faapea ma taaloga suetupe, ae ua ama i le faamaopoopoina o fanau ma aiga.

Mana'oga.

Ina ia aoao mai pea lona finagaloia te i tatou, ina ia aua lava nei faaseseina o tatou loto, i mea faatosina ole olaga nei, a ia tumau pea lo tatou faamaoni ia te Ia.

Ina ia tausolomuaiate i tatou uma o e taiulu ma taitai, ona faasino tagata uma i ala tonu o le Atua, latou te maua uma ai le manuia, atoa foi ma le ola e faavavau.

Ina ia faatumauina e le mana o le Agaga Paia, le soifua talitonu ma le faatuatua o le ekalesia, ma o tatou tagata i le Atua, ma lana taitaiga alofa.

Fepuari 17 – 23 2019.

Tusi Faitau: Ioane I: 6 – 13.

Manatu Autu: Ia fai i tatou ma molimau a le Atua.

Fa'afetai.

Ona o lona faaaupagaina o o tatou tagata faatauvaa i lona mana paia, aua le faaauauina o lona finagalo i le lalolagi agasala, e tauivi ai mo mea sili, mo le Alii ma lona viiga.

Ona o lo tatou ola ua Ia filifilia e molimau mo Ia, ma lana galuega o le faaolataga.

Ona ua tatou iloa, o a mea iti ua i o tatou lima, o le Atua na te faateleina, o le a foi lo tatou le atoatoa, o le Atua nate faaatoatoaina i tatou, ma o Ia foi tatou te maua aile manumalo ma le faaeaina.

Fa'atoeseaga.

Ona ua tatou tuu i le vaai maualalo mai o tagata, ae galo ai le Atua, na Ia tofofi ma valaauina i tatou.

Ona ua tatou faataligatuli i le musumusu mai o le Agaga ole Atua, tatou te maua uma ai le lototele, e finafinau ai mo le mea moni.

Ona ua i ai taimi ua faapito ai le tatou vaai, i e malolosi ma tu lelei i le olaga, ae faatuatuanai i e vaivai ma le le tauoloa.

Mana'oga.

Ina ia moni le ofoina atu o lo tatou ola, e tautua ai lona finagalo paia, ina ia tutusa tagata uma i le tatou vaai, e pei ona finagalo ai le Alii.

Ina ia foai maile loto tele, tatou te tutu ai ma tetee atu i faiga ale fili ma le tiapolo, o loo taumafai e faaleaga mai, i le galuega tala'i a le ekalesia.

Ina ia tumau le faamaoni o le tatou molimau mo le Alii le Atua, i aso uma o lo tatou ola, e ala i le faataunuaina o a tatou feau ma galuega.

Fepuari 24 – Mati 02 2019.

Tusi Faitau: Filipi 4: 10 – 20.
Manatu Autu: O faamanuiaga a le Atua.

Fa’afetai.

Ona o le Alii o le Taitai ma le Leoleo Sili, tatou te malu ma saogalemu ai, pe a moni lo tatou faatuatua ia te Ia, ma lona alofa tunoa.

Ona o lenei faamanatu taua i faamanuiaga a le Atua, ma lona tamaoaiga sasaa mai mo soo se tagata, e faavae le ola ma mea uma ia te Ia.

Ona o fanau, o ana meaalofo foaifuaina mai i matua, ina ia faaeaina ai aiga, ma ia viia ai le Atua i o latou olaga.

Fa’atoeseaga.

Ona ua lelagonaina e fanau le aoaiga, ma le faatonuga a matua, ona ua fiafia o latou olaga i mea e leai se aoga.

Ona ua tatou le fiafia tatou te saili fesoasoani ia Iesu Keriso, lo tatou Alii ma le Faaola, ona ua faamalieina o tatou mata faaletagata, i le matalasi o tuinanauga o le agasala.

Ona ua avea le poto ma le atamai, ua leiloa ai e ni isi o fanau, ona ava ma alolofa i o latou matua, a ua sili ai foi ona latou leiloa, ona ava ma matau i le Atua.

Mana’oga.

Ina ia fesoasoani le Agaga o le Atua i loto o a tatou fanau, ina ia latou taliaina aoaoga aoga o loo aoaoina ai i latou, ma avea ai i latou ma ala o faamanuiaga, mo aiga nuu ma ekalesia.

Ina iaaua nei o tatou faamaualuga, i so tatou atamai ma le malosia ua maua, a ia tatou fiafia pea e galulue, ma atinae faatasi ma le Atua.

Ina ia aua nei fiugofie, i tatou o matua i o tatou tiute, o le faatonu lea ma aoao ma faasino fanau, I le Atua ma lona finagalo paia.

Mati 03 – 09 2019.**Tusi Faitau: 3 Ioane 1 : 1 – 4.****Manatu Autu: O fanau o le meaalofa mo le aiga ma le Ekalesia.****Fa'afetai**

Ona o le Atua ma ana faamanuiaga mo le tagata faatuatua, lea ua manuia ai o tatou aiga nuu ma ekalesia, faapea masi o tatou malo ma le atunuu.

Ona e tulaga ese lava lona agalelei, ma ana meaalofa i le tagata e ava ma matau ia te Ia, ma faia lona finagalo.

Ona o faamanuiaga a le Atua, e le mafai ona uma ae faaauau pea, mai lea tupulaga ma lea tupulaga, seia oo i le iuga.

Fa'atoeseaga.

Ona ua sosolo faaafi le amioleaga ma tu'inaanau,ua afaina ai le fanau iti, aemaise o tupulaga a le Ekalesia.

Ona ua tele ina sauaina ma faaleagaina, nai fanau e o latou lava matua, o le faailoga ua leai se ola mata'u i le Atua ma lona finagalo.

Ona ua matele ina tatou talituaalimaina, faamanuiaga ma le alofa laulausasa mai o le Atua i aso uma, ona o le pupu o o tatou loto, i mea e pala ma ati e le mogamoga.

Mana'oga.

Ina ia maua e fanau uma,le ava ma le mata'u i le Atua, e faamanuiaina ai o latou olaga.

Ina ia tumau Samoa ma o tatou tagata uma, i le mata'u ma le faatuatua faamaoni i le Atua, e manuia ai mea uma i le tatou faigamalaga.

Ina ia fusia matua ma fanau, i totonu o aiga uma o le atunuu, i le faamaoni amiotonu ma le alofa moni faale Atua, ona tatou maua uma lea o ni olaga, e tumu i le fiafia, tumu i le filemu ma le fealofani, e tumu foi i faamanuiaga.

Mati 10 – 16, 2019.**Tusi Faitau: Teruterunome 7 : 1 – 9.****Manatu Autu: E mata'utia le alofa faamaoni o le Atua.****Fa'afetai.**

Ona e ui lava ina tatou le faamaoni i lona finagalo paia, a ua finagalo pea e faaaogaina o tatou tagata, e atinae ai lana ekalesia.

Ona o le finagalo alofa le faatuaonia o le Atua, ua Ia faamagaloina ai pea o tatou vaivaiga faaletagata, i aso uma o lo tatou ola.

Ona o le faamanatu mai pea, o i tatou lava o ana tausi mea i lana foafoaga, ina ia tatou tausi ma leoleo ma le faamaoni, lana lafu mamoe.

Fa'atoeseaga.

Ona o le fefoifoia'i o lo tatou ola i lana galuega, e pei ona faaalua e Peteru le so'o.

Ona ua tatou faamuamua le sueina o le oa ma le tamaoiga o le lalolagi, o mamalu ma le tauleleia faaletagata, ua sili atu ai lo tatou alofa ia te i latou lava, nai loo le Alii lo tatou Faaola.

Ona o i tatou lava oni auauna le faatuatuaina, i lana galuega paia.

Mana'oga.

Ina ia aua lava nei tuulafoaiina e le Atua lo tatou ola, i le tauaveina ma le faataunuuina o o tatou tofi ma tiute, mo lana galuega.

Ina ia faaaogaina pea e le Atua, lo tatou ola ausage ma le le talafeagai, mo lana galuega ma lona finagalo paia.

Ina ia aua lava nei galo ia te i tatou uma, o i tatou o tausi mea ma leoleo, o le foafoaga paia a le Atua, ma e manaomia lo tatou usiusitai, faamaoni, amiotonu ma le alofa, e faatino ai le tatou tautua ma le auaunaga.

Mati 17 - 23 2019.**Tusi Faitau: Auega 3 : 55 – 60.****Manatu Autu: E faafogaina pea e le Atua i a tatou tatalo.****Fa'afetai.**

Ona o le pele pea o lana ekalesia, ma o tatou tagata i lona finagalo paia, o le ala foi lea e faafogaina ai pea e le Atua, lo tatou valaau atu.

Ona e ui lava ina tatou solomuli ma o ese, ma lona finagalo paia i le tele o taimi, ae na te le tuulafoaiina lava i tatou.

Ona poo le a lava lo tatou le mafaia o se mea, ae tali faaaliali mai pea le Atua, i le tatalo e faia ma le faatuatua.

Fa'atoesea.

Ona o loo fai pea ma a tatou vaisu i aso uma, le faaali atu o uiga ma amioga le talafeagai, ma lona finagalo paia.

Ona o le tatou le usiusitai i le Alii le Atua, o le ala foi lea tatou te manatu faapito ai, na o i tatou lava.

Ona o le vaivai o lo tatou ola tatalo, ua le mafai ai ona manino i le tatou vaai mea tonu uma, e finagalo le Atua tatou te faataunuaina.

Mana'oga.

Ina ia faamanino mai pea e le Atua mo i tatou ala uma, tatou te maua ai le manuia ma le filemu, i lenei lalolagi le tumau.

Ina ia faafogaina pea e le Atua, lo tatou saili fesoasoani atu, pe a tatou fetaia'i ma tiga ma faigata o le ola.

Ina ia galue mai pea le Agaga o le Atua, e faamalosiau ma faamautinoa, i o tatou loto uma lana pule aoao, i mea uma i le lagi ma le lalolagi, e oo lava i lo tou soifua ma so matou ola.

Mati 24 - 30 2019.

Tusi Faitau: II Samuelu 22: 1 – 6.
Manatu Autu. O le manuia e maua i le Fale o le Atua.

Fa'afetai.

Ona o le Alii lava le Atua ma lona alofa tunoa, o loo amata mea i le saunia o mea lelei uma, mo le manuia o o tatou tagata.

Ona o lona faamanatu mai pea ia te i tatou, o le Fale o le Atua, e tafe faavaitafe mai ai manuia mo le fanau uma a tagata, e faamaoni le matata'u ma le faatuatua i ona luma.

Ona o le finagalo lava lea o le Atua mo i tatou uma, ia fusia i tatou uma ma a tatou fanau, o aiga nuu ma ekalesia ma le atunuu, i le alofa filemu ma le fealofani.

Fa'atoeseaga.

Ona ua le tausolomua le ekalesia, i mea e filemu ma ola saoloto ai le fanau a le Atua.

Ona ua vaivai lava le ola tapua'i o le ekalesia, ma lana galuega faaperofeta, ua le mamafi ai i le molimauina o Iesu Keriso, ma le faaolataga.

Ona ua mua ona tatou saili faamanuiaga o le lalolagi, ae galo ai ona saili le Atua, tatou te maua ai le ola e faavavau.

Mana'oga.

Ina ia tatou iloa ona soloia pa vaeloto uma, e tupu ai le femisaa'i ma le fefulituaa'i o o tatou tagata, ina ia maua e tagata uma le filemu, aua o le finagalo moni lea o le Atua mo i tatou.

Ina ia aoaoina pea i tatou, ina ia tumau le faamaoni o lo tatou ola talitonu, ma lo tatou ola faatuatua i le Atua, i taimi ma aso uma.

Ina ia uluulumatafolau ma lagona e tagata uma, le leo faaperofeta a lana ekalesia, ina ia maua ai pea ni agaga se tele, mo le malo o le Atua e faavavau.

Mati 31 – Aperila 6 2019.

Tusi Faitau: Ioane 6 : 35 – 40.

Manatu Autu: O le Atua e malie ai ou mana’o i mea lelei uma.

Fa’afetai.

Ona o lana faamasinoga amiotonu, ua Ia faatietie ai pea i le maa salafa o faamanuiaga, le tagata e saili ma tatalo faatauana, ma le faatuatua ia te Ia, i aso uma o lona ola.

Ona o le faaalua pea e le Atua, o lona paia ma lona mamalu ma lona silisiliese, i le soifua o o tatou tagata faatuatua.

Ona o lona tamaoaiga faasafua mai pea, mo i tatou lana fanau, ua le gata i le itu i le tino, a ua silisili ai le soifua faaleagaga.

Fa’atoesea.

Ona o lo tatou manaolasi, ua iu ai ina tatou solipala, tulafono ma poloaiga a le Atua.

Ona o le faigofie ona galo ia te i tatou, le alofa ma le agalelei o le Atua, pe a faaeaina i tatou i paia ma mamalu faalelalolagi.

Ona ua tele ina lape, le taitaiga alofa a le ekalesia, ua mafua ai le le maua’a, o le soifua faaleagaga o o tatou tagata.

Mana’oga.

Ina ia faatamaoigaina e le Atua, lana afaigaluega tofofi i lona tumu atoatoa, aua le tausia o lana ekalesia.

Ina ia tumau pea le alofa ma le agalelei o le Atua, i o tatou tagata ma lana ekalesia, tatou te maua uma ai le manuia ma le filemu.

Ina ia faatonutonu ma faamalosiau mai pea, le Agaga Paia i o tatou tagata, tatou te galulue ai pea ma le finafinau ma le punoua’i, tatou te faia mea sili mo le Atua, ma lona finagalo.

Aperila 7 – 13 2019.

Tusi Faitau: Filipi I: 27 – 30.

Manatu Autu: Ia naunau le Ekalesia i le faaolataga.

Fa'afetai.

Onao lana faasinoga foi lenei mo lana ekalesia, ina ia faaaogaina lo tatou ola faatauva, e tautua ma atinae ai lana galuega paia.

Ona o lana galuega o le faaolatga mo le tagata agasala, aua o Ia lava o le filemu ma le loto maualalo.

Ona o lenei faaolataga tele, ua saunia lava e le Atua i lona soifua paia, e le mafai ona lava pe lanu, i se tatou tala e fai.

Fa'atoesea.

Ona ua le mamafa ia te i tatou, le galuega faaola a Iesu, ina ua suamalie ia te i tatou, ala o le agasala ma le amioleaga.

Ona ua tatou le maua le loto maualalo, e faatino ai le tatou tautua ma le auaunaga i le Atua, i aso uma o lo tatou ola.

Ona ua matua leai lava so tatou ola salamo, ma so tatou loto faamagalo, tatou te lagonaina ai le iuleo o le fia ola, o loo tagi ma alaga mai.

Mana'oga.

Ina ia tumau pea lana ekalesia i galuega o le alofa, ina ia laveai ma faaolaina ai agaga, o lana fanau.

Ina ia agalelei mai pea le Atua, ma faamanatu mai mo i tatou uma, le loto maualalo ma le usiusitai faamaoni, e faatino ai lona finagalo paia, e pei ona Ia aoao mai, e ala i lona soifuaga atoa faaletagata.

Ina ia ave le galuega a le ekalesia ma o tatou tagata, e taitai mai ai i latou uma o loo ola pea i le pogisa, i le malamalama, ma faaolaina ai o latou agaga.

Aperila 14 – 20 2019.

Tusi Faitau: Galuega 17: 1 – 4.
Manatu Autu: O Puapuaga sa oo ia Iesu.

Fa'afetai.

Ina ua tatou iloa ona ola i le alofa, faamaoni ma le loto faamagalo, ole faataitaiga taua lea tatou te faaali atu, e faasaoloto mai ai i latou uma, o loo saisaitia e le tiapolo ma ana au.

Ona o le faaolataga, o le taulaga e le mafai ona faatusalia, ini galuega ma ni mea lelei tatou te faia.

Ona ua Ia le taofi mau i ona mamalu tau tupu, a ua Ia finagalo malie o le a fai o Ia ma pologa, ina ia tatou magalo ma saoloto ai.

Fa'atoeseaga.

Ona ua tatou manatu mama, i lo tatou va feagai ai ma lo tatou Matai, ma lona filifilia oi tatou e aveia ma ona nuu.

Ona o i tatou o tagata ua toilalo pea, i le malosi o le agasala, ma ua tatou le usiusitai ai i le finagalo paia o le Atua.

Ona o le tele ma le anoanoai oo tatou vaivaiga faaletagata, ua le mafai ai ona tuuina atu atoatoa, lo tatou ola mo le Alii.

Mana'oga.

Ina ia tatou tutumau, i le loto talitonu ma faatuatua i lona mana, aua o le malosi lea tatou te mafaia ai mea uma.

Ina ia lagona e tagata uma, le moni ma le faamaoni o le alofa faale Atua, o le alofa e le fiu ma solomuli gofie, i ni faigata e oo mai.

Ina ia faapea foi ona moni ma faamaoni, le ofoina atu o lo tatou ola, e auauna tautua ma atiae ai lana ekelesia, i Samoa ma atunuu e mamao.

Aperila 21 – 27 2019.

Tusi Faitau: Ieremia 29: 10 – 14.

Manatu Autu: O loo faatasi pea le Atua ma ona tagata.

Fa'afetai.

Ona ua avea le afio o le Atua i mea uma, ua iloa ma talitonu ai tagata faapaupau, i lona mamalu ma lona matautia, ma lona silisiliese.

Ona o loo faatasi mai pea le Atua, mana silafia o tatou manaoga, ma mafatiaga uma.

Ona o loo faamanatu ma faamanino mai pea, ia te i tatou uma i lea aso ma lea aso, ua nao Ia lava le Atua moni e toatasi, e ao ona ifo ma tapuai i ai tagata uma.

Fa'atoeseaga.

Ona a tatou fetaii ma puapuaga ma faigata, ona tatou fesiligia lea, o le i ai o le Atua ia te i tatou.

Ona o le tele o taimi, ua tatou nonofo ma faapumoo le Atua, i totonu oo tatou fale ma pa.

Ona e tiga lava ona tatou iloa, o loo i ai faatasi le Atua ma i tatou uma, ae tatou soli lava lona finagalo paia, ma fai le agasala ma le amioleaga.

Mana'oga.

Ina ia faamalosi i tatou uma e le Agaga o le Atua, tatou te u'umau pea i le tatou talitonuga, ma faatuatuaga ia te Ia.

Ina ia aoaoina pea i tatou ma a tatou fanau, ina ia tatou mautinoa le i ai pea o le Atua faatasi ma o tatou tagata, i taimi ma aso uma o lo tatou ola.

Ina ia faasusulu atu pea i o tatou olaga i taimi uma, le alofa faamaoni ma le amiotonu, le agamalu onosai ma le loto faamagalo, aua o faailoga na o le lotolotoi pea, o le Atua ia te i tatou.

Aperila 28 – Me 04, 2019.

Tusi Faitau: Isaia 2: 1 – 5.

Manatu Autu: Savavali faatasi i le malamalama o le Atua.

Fa’afetai.

Ona ua avea lava ana afioga paia ma ana tulafono, e fai ma faasino ala amiotonu, mo i tatou uma lana fanau.

Ona o le Alii lava, o le sulu ma le malamalama mo le tatou faigamalaga, i lenei tausaga ma le agai atu i le lumanai.

Ona o loo Ia faamanatu mai pea, mo i tatou uma ma le ekalesia, o ala o le alofa faamaoni ma le amiotonu, tatou te maua uma ai ni olaga e tumu i le fiafia, manuia ma le filemu.

Fa’atoeseaga.

Ona ua tatou manatu mama ma faatalale, i le alofa tunoa o le Atua, ua tosina ai o tatou loto i taitaiga leaga, a le fili ma le tiapolo.

Ona ua tatou mumusu e mulimuli atu, i le malamalama o lana taitaiga mana, a ua tatou fiafia lava e nonofo, i ala o le pogisa.

Ona ua avea le tatou faasiliaupule i le Atua, ua punitia ai le susulu atu o lona malamalama, i tagata uma o loo fia maua o Ia.

Mana’oga.

Ina ia manino lelei pea i le ekalesia, ma o tatou tagata lotu uma, o le mausali ma le faamaoni o lo tatou faatuatua i le Atua, e letau fesiligia ai lo tatou manumalo ma le faaeaina.

Ina ia avea pea le galuega mana a le Agaga, tatou te faia ai mea sili mo le manuia o isi, ma le viiga o le Atua.

Ina ia aua lava nei o tatou femisaa’i, ma fefulituaa’i i le ala.

Me 05 – 11, 2019.**Tusi Faitau: Salamo 86: 1 – 10.****Manatu Autu: E le faatusalia le malosi o le mana o le Atua.****Fa'afetai.**

Ona o le alofa le mavae o le Atua mo i tatou, ua Ia le tuulafoaiina ai o tatou tagata i tiga ma puapuaga, ma faigata o le olaga.

Ona o loo faamanatu mai pea ia te i tatou, o le Alii le Atua na faia mea uma lava i le amataga, e usiusitai foi ma faalologo mea uma ia te Ia.

Ona o le Atua lava ma le malosi o lona mana, nate faia ai mea sili, mo o tatou tagata faatauvaa.

Fa'atoesea.

Ona o lo tatou fefefe ma palaaai, e talai ma faailoa le upu moni a le Atua.

Ona oi tatou o tagata faatuatua iti, e mafua ai ona tatou magoto gofie, pe a agi ma to ta'uta'u mai, luitau o le olaga.

Ona ua galo ia te i tatou i le tele o taimi, oi tatou lava ia le fanau a tagata, ua nao ni mea faigaluega i aao o le Alii.

Mana'oga.

Ina ia tatou iloa ma le mautinoa, oi tatou o tagata ua filifilia e le Atua, e faailoa ma talai atu lona finagalo paia.

Ina ia aveeseina ma o tatou loto, le ola femoumoua'i ma le masalosalo, a ia manino pea i le tatou vaai faaleagaga, e leai se mea e tasi e faigata i le Atua.

Ina ia malamalama lelei io tatou loto uma, o le Alii le Atua e pule aoao i mea uma, o Ia foi na te aumaia le malosi i taimi tatou te vaivai ai, ma le atamai i taimi tatou te leiloa ai ona fai o se mea.

Me 12 – 18 2019.

Tusi Faitau: Faataoto 31: 10 – 30.
Manatu Autu: O le Tina e alofa faamaoni.

Fa'afetai.

Ona o faaaoaoga lelei, ina ia tatou muai saili le Alii ma lona alofa tunoa, i le taeao segisegi o aso taitasi, ona tatou maua ai lea o le toafilemu ma le loto tele, e faatino ai a tatou feau ma galuega.

Ona o nai tina, na latou muai asia le tuugamau o le Alii, ma latou aumai ai le talalelei ua toetu Iesu, o le taunuuga foi lea ma le atoaga, o le faaolataga mo o tatou tagata agasala.

Ona o Iesu Keriso, ma lana sailiga faatina alofa moni, ua laveaiina ai i tatou uma, ma a tatou fanau.

Fa'atoeseaga.

Ona ua le mafai ona iloa i le tele o taimi, le soifua faatina alofa moni, i totonu oo tatou aiga, o nuu ma ekalesia.

Ona o lo tatou tutu mamao ma Iesu i le tele o taimi, ona ua faamuamua o tatou tagata, ae faamulimuli le Atua.

Ona o lo tatou faamaualuga ma le manatu faapito, ua le atagia ai le alofa moni faatina, e pei ona faataitai mai e Iesu, i o tatou olaga.

Mana'oga.

Ina ia faatupu teleina e le Agaga Paia, le amiotonu ma le faamaoni i o tatou tina uma, latou te finafinau ai e faamalosi, ia te i latou uma ua solomuli ma faavaivai.

Ina ia faaaupagaina pea i tatou uma e le Agaga Paia, i le malosia ma le atamai, tatou te tauivi ai ma le filiga, e faatino ma faataunuu o tatou tofi ma tiute.

Ina ia faatumuina pea e le mana o le Atua, tina uma o Samoa ma le lalolagi, latou te galulue ai ma le filiga, e saili ma taitai fanau, o aiga o nuu ma ekalesia, i le Alii le Atua ma lona finagalo paia.

Me 19 – 25 2019.**Tusi Faitau: Salamo 23.****Manatu Autu: Tatalo faatasi ina ia manuia le Ekalesia.****Fa'afetai.**

Ona o le Atua na te silafia mea uma lava, o Ia foi na te fesoasoani mai i soo se mea, tatou te vaivai ma mativa ai.

Ona o le Atua lava na aoao mai, ina ia tatou iloa ona fesootai atu ia te Ia, i le tatalo ma le faatoga e le aunoa, e le gata i taimi o puapuaga ma faigata, ae faapea foi i taimi o le sologa lelei.

Ona o le faafogaina pea e le Atua, o le soifua tatalo oo tatou tagata ma le ekalesia, aua se manuia o Samoa ma le lalolagi atoa.

Fa'atoeseaga.

Ona ua tatou le lagonaina, le musumusuga a le Agaga i mea tonu uma, e ao ona tatou faia mo le manuia o tagata uma, ma le viiga o le Atua.

Ona o le vaivai pea o lo tatou ola tatalo, ma le mafuta atu oo tatou tagata i le Atua.

Ona a sologa lelei ma filemu, mea uma o le olaga, ona tatou faamulimuli lea o le Atua, ae faamuamua o tatou tagata.

Mana'oga.

Ina iatapenaina finagalo ma faamoemoe o le au Kerisiano uma, e talia ai le afio ifo o le Agaga Paia.

Ina ia agalelei mai pea le Atua, ma faataunuaina ma le manuia fuafuaga uma, o le agai atu o le Ekalesia aoao i lana Fonotele, i lenei foi tausaga.

Ina ia tupu lauolaola pea, le soifua tatalo o le ekalesia ma o tatou tagata, tatou te maua ai le malosi, e tauamionuina ai lo tatou ola, ma faamanuia mai le Atua, e tusa ma lona alofa tunoa.

Me 26 – Iuni 01 2019.**Tusi Faitau: Pese a Solomona 7: 11 – 13.****Manatu Autu: Ia mausali lo tatou faatuatua i le Atua.****Fa’afetai.**

Ona o lona finagalo, ia aua lava nei avea i tatou ma lala e salaeseina, ona ua tatou le fua mai ini fua lelei.

Ona o le faamaoni pea o lona alofa, ua Ia fafagaina ai pea i tatou i mea lelei, o lona malo e faavavau.

Ona o loo tumau pea le faamalosiiau a le Agaga Paia, i le ekalesia ma o tatou tagata i taimi uma, ina ia aua lava tatou te faalotolotolua ma femoumoua’i.

Fa’atoeseaga.

Ona ua papau lo tatou ola talitonu, ma faatuatua i le Alii, ma lana tausiga alofa mo i tatou i aso uma, e mafua ai ona tatou le fua mai ini fua lelei, mo lana feau ma le galuega.

Ona o i tatou lava oni vine ua ola faalautagitagi, ona o faiga a Satani, ma ua le atagia ai le alofa, faamaoni ma le amiotonu a le Atua, i o tatou olaga.

Ona o le faigofie ona faaseseina o tatou tagata, i faaososoga a le fili ma le tiapolo.

Mana’oga.

Ina ia fiafia le ekalesia ma tagata uma, e tatalo ma faatoga, ma mafuta atu i le Alii le Atua, i aso uma e le aunoa.

Ina ia saga tupu tele ma lausiusi lo tatou ola talitonu, ma faatuatua i le Atua, tatou te faia ai pea mea sili, mo Ia ma lona finagalo paia.

Ina ia tatou manatua pea i taimi ma aso uma, o le Atua lava o le pogai o le tatou tautua ma le auaunaga, ina ua Ia filifilia ma totofi i tatou, mo lana galuega paia.

Iuni 02 – 08 2019.

Tusi Faitau: I Koronito 15: 50 – 58.
Manatu Autu: Ia tupu olaola lo tatou faatuatua.

Fa’afetai.

Ona o le silafaga a le Atua, i tagata faatuatua ma talitonu atoatoa ia te Ia, na te faia ai vavega ma mea ofoofogia, mo le manuia o lana fanau.

Ona o le meaalofa, o le faatuatua mai le Atua mo tagata uma, ua le gata ina tatou maua uma ai le malosi, e faatino ai lo tatou valaauina, a ua manino lelei ai foi le tatou vaai faaleagaga, i faamanuiaga o le ola e faavavau.

Ona e ofoina mai e le Atua, le manuia i tagata uma, e mulimuli atu ia te Ia, ma le faatuatua faamaoni.

Fa’atoeseaga.

Ona o le teleo taimi, ua fua a tatou faaiuga i mea ua vaaia, a ua tatou le faamoemoe ma faalagolago, i le galuega a le Agaga.

Ona o le femoumouai o lo tatou faatuatua, ua gata ai lava a tatou tatalo io tatou laugutu, ae leo i ai o tatou loto.

Ona o le faata’eta’ealuga, o lo tatou ola faatuatua i le Atua, e mafua ai ona le atoatoa, le tuuina atu oo tatou tagata, e faatino ai lona finagalo.

Mana’oga.

Ina ia le mapu le faamalosiua mai o le Agaga ia te i tatou, tatou te mafai ai ona tumau ma taofimau, i lo tatou faatuatua ia Iesu Keriso, lo tatou Alii ma le Faaola.

Ina ia tupu lauolaola ma lauusiua pea galuega alofa, atoa ma mea lelei tatou te faia, e viia ai pea le suafa mamalu o le Atua e faavavau.

Ina ia avea lo tatou faatuatua, e fai ma puna o le malosi, tatou te manumalo uma ai, i taimi o faigata, mafatiaga ma puapuaga o le olaga.

Iuni 9 – 15, 2019

Tusi Faitau: I Peteru 3: 8 – 12.
Manatu Autu: E taua le ola fealofani.

Fa'afetai.

Ona o lona finagalo maualuga lava lea, mo i tatou uma o lana fanau, e tatau ia i tatou uma ona ola i le alofa, o le tasi i le isi.

Ona o lona alofa Tunoa mo i tatou lana fanau, aemaise lana Ekalesia, o lona tino paia i le lalolagi.

Ona e ui ina eseese o tatou tupuaga, peitai ona o lana ekalesia, ua aoaoina ma manino ai i tatou uma i fua o le Agaga, e tatau ona tatou savavali ai.

Fa'atoeseaga.

Ona ua leai se faamaoni ma se alofa i le ekalesia, ua faaaoga sese ai le pule na tuuina mai, e taitai ai le fanau a le Atua i lana galuega.

Ona ua tatou le tausia le fealofani ma le felagolagomai, ona ua malosi lo tatou manatu faapito ma le faamaualuga, i isi o tatou uso a tagata.

Ona o lo tatou faatamala, ua afaina ai le tupu lauolaola, o le galuega paia a le Atua.

Mana'oga.

Ina ia mafuta mai pea le Agaga o le Atua, i o tatou tagata ma lana ekalesia, tatou te faatino ai ma le faamaoni, lona finagalo i le lalolagi.

Ina ia lagona e tagata uma ma le ekalesia, le loto maualalo ma le alofa, e atiae ai le talalelei, e pei ona faatinoina e Iesu Keriso, le Faaao o le ekalesia.

Ina ia maualuga le alofa ma le agalelei, i le va feagai ai o tagata uma, aemaise le va tapuia ma le Atua soifua.

Iuni 16 – 22, 2019.

Tusi Faitau: Mataio 13: 31 – 34.

Manatu Autu: Ia avea le Ekalesia ma laau mafala e toomaga i ai le au faatuatua.

Fa'afetai.

Ona ua faailoa mai e le Tusi Paia le poto o le Atua, ua mamanu ai le tofa saili, a le tagata faatuatua.

Ona o le faamaoni o le alofa o Iesu mo i tatou, na Ia onosai ai lava i tiga ma puapuaga.

Ona e ui ina ufitia i tatou i le pogisa, ona o tu'inanauga o le agasala, ae o loo vavala mai pea le malamalama o le faaolataga, i le galuega a le ekalesia, mo lo tatou faaolaina.

Fa'atoeseaga.

Ona ua avea le ita ma le alofa faavalea, ua tatou manatu mama ai, i le tofa ma le faautaga mai le Agaga o le Atua, e taitai ai lo tatou ola.

Ona o lo tatou vaivai faaleagaga, ua seetia gofie ai o tatou tagata, i faiga faatosina a le tiapolo, ma tatou pauu ai i le tele o taimi.

Ona ua faavae a tatou faaiuga, i le poto faaletagata, a ua tatou le fesili muamua i le Atua, mo lona finagalo.

Mana'oga.

Ina ia mauaa le faatuatua o tagata lotu i le Atua, ina ia le seetia gofie ai i le faatosina mai, a lotu le Kerisiano.

Ina ia faapaia e le Alii le tofa ma le faautautaga a le ekalesia, e afua ai ona faia mea uma i le alofa, faamaoni ma le amiotonu.

Ina ia avea le ekalesia ma laau mafala, e toomaga ma sulufai atu i ai tagata uma, o loo fia maua se fesoasoani ma se filemu.

Iuni 23 – 29 2019.

Tusi Faitau: Isaia II: 1 – 9.
Manatu Autu: O le faamoemoe o le ola.

Fa’afetai.

Ona e le gata i le lalolagi ma lenei olaga, le faamoemoe o le ola ua faailoa mai mo i tatou, ae toai taunuu lava i le malo o le Atua e faavavau.

Ona o le Tusi Paia, o loo faamanatu mai ai pea lo tatou faamoemoe i le Alii, aua ua nao Ia tatou te maua uma ai, le manuia male ola.

Ona ua faamanino mai mo i tatou mea uma, o le mata’u i le Atua, tatou te maua ai le malosi ma le poto, tatou te maua ai foi le ola.

Fa’atoeseaga.

Ona o le sese o le auala, ua tatou sailia ai le faamoemoe o le ola, ua saunia e Iesu mo i tatou.

Ona o le faigata ia te i tatou, ona tatou talia ma le loto maualalo, aoaoga ma le feau ua aumai, tatou te maua ai le ola.

Ona ua tatou manatu mama ma faatalalē, i le faamoemoe o le ola mai le Atua, ona ua tatou faasili le oa ma le tamaoaiga o le lalolagi.

Mana’oga.

Ina ia tatou tuuina uma atu i le Atua o tatou faamoemoega, aua ua nao Ia e maua ai e o tatou tagata, faamanuiaga o le ola atali.

Ina ia galue ma faatonutonu mai pea, le Agaga o le Atua, e manino ai le tatou vaai, i le faamoemoe o le ola mai ia te Ia, ma faaosofia ai lo tatou finafinau e tumau ai .

Ina ia aua lava nei faapogisaina e Satani, i tatou ma a tatou fanau, i le faamoemoe o le ola ua aumaia e Iesu, mo le fanau uma a tagata.

Iuni 30 – Iulai 6, 2019.

Tusi Faitau: I Tesalonia 5: 12 – 21.

Manatu Autu: E le tineia le afi o le ola faatuatua.

Fa'afetai.

Ona o lona faamanatu mai, e iloa gofie lava le tagata e tumau ia te Ia, tusa lava poo a tiga ma faigata, e le solomuli ma faavaivai ai.

Ona o aoaoga ma taitaiga a le Agaga Paia, o loo faatupu teleina ai pea lo tatou ola talitonu, ma lo tatou ola faatuatua i le Alii Atua.

Ona o le faamaoni o le alofa o le Atua, mo i tatou le fanau agasala, e tiga ma mafatia ai foi faatasi ma o tatou tagata, pe a lofia i tatou i peau vale o le olaga.

Fa'atoeseaga.

Ona ua tatou faalogo ma usitai i tagata, a ua tatou le faalogo, ma le usitai i le Atua.

Ona tatou te solomuli ma faavaivai, pe a ogaoga mea faigata tatou te fetaiiai.

Ona o le sese o le tuualalo ma le fautuaga, tatou teave i isi uso a tagata, ua taumamao ai i latou male upu moni, e maua ai le ola.

Mana'oga.

Ina ia aua lava ne tineia e le malosi o le fili ma le tiapolo, lo tatou ola talitonu ma lo tatou ola faatuatua i le Atua, ma lana pule aoao i mea uma o le lagi male lalolagi, e oo lava i lo tatou ola.

Ina ia tumau pea io tatou luga uma, le Agaga o le Atua, e faamalosiau ma faamafanafana io tatou tagata, pe a oo mai puapuaga ma faafitauli.

Ina ia tatou tumau pea i le onosai ma le faapalepale, aemaise o le mautinoa, e le tuulafoaiina i tatou e le Atua, ao tatou galulue ai, e faatino lo tatou valaauina.

Iulai 07 – 13 2019.

Tusi Faitau: II Koronito 8: 8 – 15.
Manatu Autu: Faatamaoigaina ia Keriso.

Fa’afetai.

Ona o lona tamaoaiga, o loo tatou tufitau fao i aso uma, e ui e galo ia te i tatou le Alii i le tele o taimi, ae o loo Ia faasoa mai pea, mea ua tatau mo le aso.

Ona o le toe-tu o keriso o le tamaoaiga sili lea, mo le au faatuatua i le ola e faavavau.

Ona o le tamaoaiga o Keriso, e le mafai ona faaititia pe uma, mo tagata uma e faatuatua faamaoni ia te Ia.

Fa’atoesega.

Ona o lo tatou limamau, e faasoa atu lona tamaoaiga, mo isi uso a tagata.

Ona ua tosina le tatou vaai, i le tamaoaiga o le lalolagi e pala, ae tuu lona finagalo tatou te manuia ai.

Ona ua faatauasoina pea i tatou, e o tatou vaivaiga ma tuinanau faaletagata, ua ama ai le silasila i le tamaoaiga o Keriso, tatou te maua ai le ola.

Mana’oga.

Ina ia foai mai pea mea ua tatau, mo lo tatou ola lelei i aso uma.

Ina ia faatamaoigaina peale Ekalesia, i lona tumu faaleagaga, aua le manuia o lana galuega tala’i.

Ina ia tatou faaogaina ma le tatau, le tamaoaiga o Keriso ua io tou aao ma o matou lima, mo le manuia o tagata uma, male viiga o le Atua.

Iulai 21 – 27 2019.

Tusi Faitau: Galuega 13: 1 – 3.
Manatu Autu: Valaauina mo le feau.

Fa'afetai.

Ona o le faatufugaga a le Atua i tomai ma agavaa eseese, ua tatou galulue ma auauna ai, ua tatou maua ai ona manuia.

Ona o lo tatou valaauina e fai ma Kerisiano, ua tatou iloa ma maua ai, le faaolataga a le Atua e ala ia Keriso, lona Alo pele.

Ona ua amanaiaina i tatou e le Alii, ma valaauina mo lana galuega.

Fa'atoeseaga.

Ona o lo tatou le faamaoni, i o tatou valaauina i aiga, nuu le malo ma le ekalesia, ua mafua ai le tele o faafitauli, ua aliae mai i aso uma.

Ona ua tatou le matuā lagonaina, lo tatou valaauina e le Alii, ona ua manumalo le lalolagi ia i tatou.

Ona tatou te fiafia e talia le valaau a le Alii, pe a maua mai ai se tatou mea, ae faataligatuli pe a nao le mativa, ma le le tagolima.

Mana'oga

Ina ia fesoasoani mai lona Agaga, tatou te matuā maelega ai, e fai o tatou tiute, ua valaauina i ai i soo se tafa, o aiga nuu ma ekalesia.

Ina ia faaaauu pea lona valaauina o a tatou fanau, aua le ekalesia ma le talalelei.

Ina ia faaosofiaina i tatou uma e le Agaga o le Atua, e tuu atoa mea uma ua ia i tatou e oo lava i lo tatou ola, e talisapaia ai lo tatou valaauina, e pei ona faia e Iesu Keriso i lona ola.

Iulai 28 – Aokuso 03, 2019.

Tusi Faitau: Isaia 40: 1 – 5.
Manatu Autu: O le mafanafana o le Atua.

Fa’afetai.

Ona e i ai pea tiga ma faigata o le ola, ae o loo tatou lagonaina pea, le pai mai o le mafanafana o le alofa o le Atua, ma lana tausiga i aso uma.

Ona ao lei i ai lava se faamafanafana, i le fanau a tagata ona o le agasala, o le Atua lava na afio mai, ma aumai lona mafanafana e alai a Iesu Keriso, ma togiolaina ai tatou uma.

Ona nao le Atua lava, tatou te maua ai le faamafanafanaga moni, e le gata tatou te malolosi ma totoa ai, e faatino lo tatou valaauina, ae tatou te maua ai foi le manuia ma le filemu.

Fa’atoesea.

Ona faatoa tatou saili i le mafanafana o le Atua, pe a lutia i tatou i peau vale o le ola.

Ona ua le maua le mafanafana o le Atua, i mafutaga i aiga nuu ma aulotu, ona o tatou uiga vaivai faaletagata.

Ona ua tatou mumusu e faalatalata, i le mafanafana o le Atua, a ua tatou opogi le mafanafana o le tiapolo.

Mana’oga.

Ina ia i ai pea mo i tatou le mafanafana o le Atua, e faatupu malosi ia tatou feau ma galuega.

Ina ia tumau pea le faamafanafanaga a le Atua, mo le au kerisiano uma o sauaina i le lalolagi, aemaise i latou o loo feagai ma tiga ogaoga o le ola.

Ina ia fusia ma lotolotoi le mafanafana o le Atua, i totonu oo tatou aiga o nuu ma ekalesia, faapea lemalo ma le atunuu, ona mautinoa lea o le manuia ma le filemu, o le tatou faigamalaga.

Aokuso 4 – 10 2019.**Tusi Faitau: Eperu II: 8 – 14.****Manatu Autu: O le faatuatua e maua ai le ola.****Fa'afetai**

Ona o le faaali manino mai e le Afioga Paia a le Atua, o le auala ma le alafua, tatou te maua uma ai le ola, ma maua atili ai lava.

Ona o le galuega mana a le Agaga Paia, io tatou tuua ma auga tama ua tofafa mai tiasa, ua fai lea ma faataimuaga o le ola faatuatua, mo i tatou uma i nei ona po.

Ona o le fesoasoani mai o le mana o le Atua io tatou tagata, ma faasaogalemuina lo tatou ola, pe a faamaoni le tumau o lo tatou faatuatua ia te Ia.

Fa'atoesea.

Ona o le faataetaealuga o lo tatou ola faatuatua i le Atua, e mafua ai ona tatou faamuamua le sailia o le oa ma le tamaoaiga, ma mamalu, ma le tauleleia faalelailagi.

Ona ua gata io tatou laugutu, le tauina oi tatou o tagata Kerisiano faatuatua, ua tutuli ai o tatou taliga e faalogo ma le manino, i le fetalai mai ole Alii.

Ona ua ama le tatou vaai, i le maliu ma le toetu manumalo o Iesu Keriso, le Alii ma le Faaola, e maua ai le ola ma le manuia.

Mana'oga

Ina ia tatou maua uma le malosi faaleagaga, tatou te lafoai ese ai vaivaiga ma manaoga faaletagata, ae tatou toe foi uma ile Atua, ma loto salamo faamaoni.

Ina ia tatou maua uma le faatuatua e mauaa ma mausali ile Alii, e le mafai ai ona tatou toilalo, i faaososoga a le tiapolo.

Ina ia tatou iloa ona tuuina atu, ma le atoatoa o le faamaoni, mea uma ua ia i tatoue oo lava i lo tatou ola, tatou te auauna ma tautua ai mo le Atua, ma lona finagalo paia.

Aokuso 11 – 17 2019.

Tusi Faitau: Isaia 41: 8 – 14.

Manatu Autu: O tatou uma o tagata filifilia o le Atua.

Fa’afetai

Ona o le filifilia oi tatou ele Atua, e faasusulu atu lona finagalo paia, i totonu oo tatou aiganuu ma ekalesia, faapea foi le malo ma le atunuu, ina iamaua uma e o tatou tagata, le manuia ma le ola e faavavau.

Ona o le galuega mana a le Agaga Paia, i totonu o le Ekalesia, o loo faamautu, ma faamausaliina ai o tatou tagata mo le Alii.

Ona o le lē tuulafoaiina, o o tatou tagata e aao alofa o le Atua, aemaise lava i ituaso e luluti ai tiga ma puapuaga ma mafatiaga, o lo tatou ola valaauina.

Fa’atoesea.

Ona o le lē moni o le ofoina atu, oo tatou tagata i galuega, e pei ona filifilia i ai i tatou e le Atua.

Ona ua pei i tatou o le fanauga a Isaraelu, le femoumoua’i i le va feagai ai ma le Atua, ona o le pupu oo tatou loto i le oa ma le tamaoaiga, ma tuinanauga fiafaamalieina o le lalolagi.

Ona ua oge o tatou olaga i le alofa, faamaoni ma le amiotonu, ina ua le atagia io tatou olaga, le atoatoa ole alofa tunoa o le Atua.

Mana’oga.

Ina ia le muta le faamalosi mai o le Atua, ma aoao ma mafutaina o tatou tagata, ao tatou galulue e faatino ma faataunuu, lana galuega o le talalelei.

Ina ia tatou faamuamua uma, le faia o galuega alofa ma le lelei, mo le filemu male manuia o isi o tatou uso a tagata, o loo saisaitia i faiga a Satani, ma mea vaivai o le olaga.

Ina ia avea lo tou soifua ma so matou ola auauna, e faaaauu ma tupu tele ai pea, le talalelei o le galuega faaola a Keriso i le lalolagi.

Aoukuso 18 – 24 2019.**Tusi Faitau: Iopu 14: 6 – 9.****Manatu Autu: Ia tumau ma mauaa lo tatou ola faatuatua i le Atua.****Fa'afetai.**

Ona o le le tuulafoaiina oi tatou e le Atua, ma tau mai, i le femoumoua'i ma le maalili gofie o lo tatou faatuatua, pe a oo mai taimi faigata o le olaga.

Ona e galue mai le Atua, e aumai mo i tatou le malosi lototele ma le atamai, e saga faamalosia ai pea lo tatou ola faatuatua, e faatino ai le tatou tautua ma le auaunaga.

Ona e ui ina faigata le olaga, ona o faaososoga a le tiapolo, ae le mafai ai ona mate lo tatou faamoemoe, i le satauro manumalo o Keriso, tatou te finafinau ai pea, e faia mea sili mo le Alii.

Fa'atoeseaga.

Ona o lo tatou solomuli ma fiugofie, mai faafitauli ma faigata o le olaga, ua le atagia ai ma talafeagai, ma lo tatou faatuatua i le Atua, ma lona finagalo.

Ona emalosi ma aasa lo tatou faatuatua, i taimi o le sologa lelei, ae a lukaluka loa le matagi o faigata, ona maalilivaoa loa lea ma tatou le mautonu,pei oni tagata ua leai se faamoemoe.

Ona o le tele o taimi, ua tatou faagalo le Atua, a ua tatou saili fesoasoani i auala faaletiapolu, e foia ai o tatou faafitauli.

Mana'oga.

Ina ia faatumulia pea i tatou uma e le Agaga o le Atua, i fuafuaga tatau ma faaiuga talafeagai, e foia ai faafitauli, o le olaga.

Ina ia faamanino mai o tatou mata faaleagaga, i le taua o auala faaIesu, e fai ma faasino ala, i le tatou tautua ma le auaunaga.

Ina ia galue le Agaga Paia, e faamalosia le ola faatuatua o le ekalesia ma o tatou tagata, e avea uma ai i tatou oni taitai lelei, e taitaia aiga nuu Ekalesia ma le atunuu, i le ola e faavavau.

Aoukuso 18 – 24 2019.**Tusi Faitau: Iopu 14: 6 – 9.****Manatu Autu: Ia tumau ma mauaa lo tatou ola faatuatua i le Atua.****Fa'afetai.**

Ona o le le tuulafoaiina oi tatou e le Atua, ma tau mai, i le femoumoua'i ma le maalili gofie o lo tatou faatuatua, pe a oo mai taimi faigata o le olaga.

Ona e galue mai le Atua, e aumai mo i tatou le malosi lototele ma le atamai, e saga faamalosia ai pea lo tatou ola faatuatua, e faatino ai le tatou tautua ma le auaunaga.

Ona e ui ina faigata le olaga, ona o faaososoga a le tiapolo, ae le mafai ai ona mate lo tatou faamoemoe, i le satauro manumalo o Keriso, tatou te finafinau ai pea, e faia mea sili mo le Alii.

Fa'atoeseaga.

Ona o lo tatou solomuli ma fiugofie, mai faafitauli ma faigata o le olaga, ua le atagia ai ma talafeagai, ma lo tatou faatuatua i le Atua, ma lona finagalo.

Ona emalosi ma aasa lo tatou faatuatua, i taimi o le sologa lelei, ae a lukaluka loa le matagi o faigata, ona maalilivaoa loa lea ma tatou le mautonu,pei oni tagata ua leai se faamoemoe.

Ona o le tele o taimi, ua tatou faagalo le Atua, a ua tatou saili fesoasoani i auala faaletiapolu, e foia ai o tatou faafitauli.

Mana'oga.

Ina ia faatumulia pea i tatou uma e le Agaga o le Atua, i fuafuaga tatau ma faaiuga talafeagai, e foia ai faafitauli, o le olaga.

Ina ia faamanino mai o tatou mata faaleagaga, i le taua o auala faaIesu, e fai ma faasino ala, i le tatou tautua ma le auaunaga.

Ina ia galue le Agaga Paia, e faamalosia le ola faatuatua o le ekalesia ma o tatou tagata, e avea uma ai i tatou oni taitai lelei, e taitaia aiga nuu Ekalesia ma le atunuu, i le ola e faavavau.

Aokuso 25 – 31 2019.

Tusi Faitau: Faamasino 6: 11 – 18.
Manatu Autu: O le filemu moni, nao le Atua e maua ai.

Fa'afetai.

Ona poo le a lava le lukaluka ma le sousou o ituaso faigata, tatou te maua uma lava le toafimalie ma le filemu, i aao alofa o le Atua.

Ona o Iesu Keriso le Alii o le filemu, ua fai ma taiala mo i tatou uma, i le malo ma le ola e faavavau.

Ona e leai lava se isi malosi, e sili atu i le malosi o le mana o le Atua, tatou te maua ai le manuia, ma le filemu moni.

Fa'atoesea

Ona ua tatou vevesi ma fefefe ma palaaai, ina ua tatou faamoemoe i lo tatou malosi ma le atamai faaletagata.

Ona ua fai i tatou ma faapogai, o le le maua ole filemu o le Atua, e le gata i totonu oo tatou aiga nuu ma ekalesia, ae faapea foi i le va feagai ai ma isi uso a tagata.

Ona ua pulea ma taitaiina e le tiapolo o tatou olaga, ua le mafai ai ona ofi mai, le filemu moni o le Atua i o tatou loto, e faatino ai lo tatou valaauina.

Mana'oga

Ina ia oo atu le mana ma le filemu o le Atua, i loto uma o tagata o si o tatou atunuu, faapea ma tagata uma o le lalolagi o loo fevataua'i, ona o le sailia o le malosi ma le pule.

Ina ia ave le filemu o le Atua, tatou te manumalo ai pea, e le gata i tiga ma puapuaga o le olaga, ae faapea foi i le anoanoa'i o faaosoosoga a le fili, e lamatia ai lo tatou ola.

Ina ia taula pea, e o tatou tagata ma le atunuu atoa, le faatinoga oo tatou olaga, i le filemu moni o le Atua, ona tatou maua ai lea o le fealofani male nofo lelei, i taimi ma aso uma o lo tatou ola.

Setema 01 – 07 2019.

Tusi Faitau: Isaia 52: 7 – 12.

Manatu Autu: Malo afua ailao ua maua.

Fa'afetai

Ona o le taeao nai Mataniu feagai ma le Ata, o le tali lea a le Atua i tua'a ua mavae, ma lo tatou saili malo, auā se manuia o Samoa.

Ona o le mana o le Atua, na saunia ai loto o tupu ma tamalii o le atunuu, i ona po o le pogisa, na mafai ai ona faaulufaleina le Talalelei o le malo o le Atua, io tatou laufanua.

Ona o le soifua fai taulaga o le ekalesia, aemaise le au faatuatua, ina ia tupu pea ma olaola le malo o le Atua.

Fa'atoeseaga

Ona ua tele taimi ua sese ai le tatou faataua, ma faamuamua ai le lalolagi, ae faatuatua'ni le Atua, ma le Talalelei.

Ona o a tatou lava amioga, ua vaivai ai le molimau atu a le ekalesia, i le Talalelei a le Atua, ma lona malo e faavavau.

Ona ua tele taimi, e lape ai le taitaiga ma le faatautaiga a pulega, o loo faafoeina le Sa o Samoa, ma o tatou tagata.

Mana'oga

Ina ia tupu malosi pea, le lagona o le leo faaperofeta i totonu o le ekalesia, aua le faamalosiaina o le Talalelei o le malo o le Atua, i loto ma agaga o tagata uma.

Ina ia iloa e soo se Kerisiano, o le tagata atoa ae le o se vaega, le taua o le soifua ofoina atu mo le Atua, ma lona finagalo.

Ina ia faamanuia e le Atua Samoa, ma ana faigamalo, ma ia ulufia e le Agaga, loto o taitai uma o le atunuu, e manino ai le tatou vaai, i mea silisili ma taua, aua le manuia o tagata uma.

Setema 08 – 14 2019.**Tusi Faitau: Mataio 7: 15 – 20.****Manatu Autu: O foliga o le auauna faamaoni.****Fa'afetai**

Ona o le faamaoni o tua'a na latou asaina le gasū o le tai taeao, e tapu'e ma fa'aolaola le galuega a le Atua, ua ae ae ai i le maa salafa o faamanuiaga, tupulaga o nei ona po.

Ona o le sao taua o tua'a ua mavae, o e sa auina atu mo le galuega faamisionare, ua totogo ae ai fua lelei oa latou galuega, i tulimanu e fia o le lalolagi.

Ona o le tele o faaaliga o le alofa o le Atua, e ala i faamanuiaga mo le ekalesia, o fua faaaliali lava ia o galuega lelei, ua faia ma le faatuatua faamaoni.

Fa'atoeseaga

Ona o i tatou o ni auauna, le faamaoni i lo tatou valaauina.

Ona o le faafoliga ma le faataetaealuga, o le tatou tautua, ua le maua ai ni fua lelei, pe a saili mai le Atua i lana faatoaga.

Ona ua tatou saili lava, o tatou manuia i le galuega, na valaauina ai i tatou e le Atua, e auauna ai mo isi.

Mana'oga

Ina ia faamanaina e le Agaga, le soifua auauna o le aufaigaluega galulue uma, o loo fitaituga mo le tala'iina o lona finagalo.

Ina ia saunia pea, e le Atua ni isi auala, e faaaogaina ai le toatele o le aufaigaluega, ua uma ona tapenaina, mo le feau o le Talalelei.

Ina ia fua pea ma olaola, le galuega o le Talalelei i Ekalesia, e ala ia te i tatou uma, o le aufaigaluega totofi.

Setema 15 – 21, 2019.

Tusi Faitau: II Koronito 13: 1 – 4.

Manatu Autu: O le mana o le Atua e malosi ai le tagata.

Fa'afetai

Ona o le mana o le Atua, o loo maua ai pea lo tatou malosi, e faatino ai a tatou feau ma galuega.

Ona o lona le tuulafoa'i mai ia te i tatou, i taimi uma tatou te fetaia'i ai, ma puapuaga ma mafatiaga o le olaga.

Ona a tatou galulue faatasi, ma le Alii i taimi ma aso uma, ona faigofie lea o mea uma, ma mama ai le tatou avega.

Fa'atoeseaga

Ona e faigofie ona galo ia te i tatou, le mana o le Agaga o le Atua, tatou te maua ai le malosi, i taimi o puapuaga ma faigata.

Ona e i ai foi ituaso tatou te masalosalo ai, i le aua'i mai o le Agaga o le Atua, ma tatou faia ai mea sese ma mea leaga, ua solipalaina ai lona finagalo paia.

Ona tatou te manatu, tatou te maua le fiafia i le suamalie ma le matalasi o le lalolagi, a ua iloa ai le papau o lo tatou faatuatua, ma lo tatou manatu i le Atua ma lana pule aoao.

Mana'oga

Ina ia lagona pea io tatou loto, le musumusuga a le Agaga, e vaavaalua pea ma le Atua, lo tou soifua ma so matou ola, i aso uma e le aunoa.

Ina ia faaaupagaina o tatou tagata, ma le ekalesia aoao e le mana o le Atua, tatou te malolosi uma ai e tauave, le galuega ma ona luitau.

Ina ia galue le Agaga o le Atua, e faamalosiau ma faalototele, ia te i latou uma o loo mafatia ma puapuagatia, ona o faafitauli ma to'atuga ogaoga o le olaga, o loo latou fetaia'i ma faafeagai.

Setema 22 – 28 2019.**Tusi Faitau: Efeso 5: 15 – 20.****Manatu Autu: Fa’apaleni le savali.****Fa’afetai**

Ona o le fa’amalosi’au mai pea o le Afioga a le Atua, a o tatou savavali i le feau o le Talalelei, ua paleni ma uli ma sao ai pea mea uma.

Ona o le savaliga a le au-fa’a-tuatua, o lo o fa’aalia ai le galulue fa’atasi, ua mafai ai ona ausia le tele o taunuuga lelei, e fa’apaleni ai le soifua i le tino, ma le fa’a-le-agaga o o tatou tagata.

Ona e le mafai ona paleni, le tatou tautua ma le auaunaga mo le Atua, pe a aunoa ma Iesu Keriso, io tatou olaga.

Fa’atoeseaga

Ona ua tele ina le paleni le tatou savaliga mo le Alii, ona o le lāvea gofie oo tatou vae, i faalavefau o tu’inanauga faaletgata.

Ona o le maaleale ma le lē mautonu, o le faatuatua o o tatou tagata i le Atua, e faasipasipa ai foi le savali a le Ekalesia, i galuega fai.

Ona ua fa’aogatonu o tatou tagata i le tele o taimi, a e fa’a-tupito le Alii i le tatou savaliga.

Manao’ga

Ina ia faatonu folau pea e le Atua le savaliga a le Ekalesia, ina ia paleni mea uma ma taunuu i le tini ma le fiafia.

Ina ia faamanatu mai pea e le Agaga, i loto ma finagalo o tagata uma, le taua o le savali ma le faaeteete ma le faatuatua lelei, e pei ona aoaoina ai i tatou e le Alii.

Ina ia maua e o tatou tagata, ma le ekalesia uma, le agaga o le uulima faatasi, ma tausoa faatasi a tatou avega ma Iesu, e mama ma faigofie ai le tatou feau.

Setema 29 – Oketopa 05, 2019.

Tusi Faitau: Filipi 4: 14 – 23.

Manatu Autu: Avea ma so’o i nofoaga faigata.

Fa’afetai

Ona o le faataitaiga sili, ua faia e Iesu Keriso lona Alo pele e toatasi, e ala i lana galuega faaola, i nofoaga faigata.

Ona o lana galuega tala’i, ua soloia ai pa vaeloto i totonu o sosaiete, ma aveia ai tagata uma ma soo.

Ona o le galuega mana a lona Agaga, ua fai ma faamalosiua i lana au galulue, i faafitauli o fetaia’i ai i soo se valaauina.

Fa’atoeseaga

Ona o le faigofie ona tatou siilima ma solomuli, ina ua tafa mai ata o faigata, ma galo ai Lē e ona le malosi uma lava, tatou te manumalo ai.

Ona tatou te folau pea i le malū e aunoa ma le Alii, ae faatoa saili i lona fesoasoani mai, pe a fesouaiina i tatou e puapuaga.

Ona ua pitotasi le tatou vaai, i le matagofie o le lalolagi, ua galo ai e vaavaalua pea lo tatou ola ma Iesu Keriso, i taimi ma aso uma. e

Mana’oga

Ina ia faalototele mai ia te i tatou, auā o Ia o le Alii o taimi uma, i soo se mea ua na valaauina ai i tatou, e fai mona soo.

Ina ia faamanino mai e le Agaga o le Atua le tatou vaai, i le malosi ma le matalasi o le sa’olotoga tatou te maua, i le ofoina atu atoatoa o lo tatou ola i ona aao.

Ina ia faamalosiua e le mana o le Alii le tatou faalogo, o le tatou vaai ma o tatou loto, tatou te iloa manino ai, o le aveia oi tatou ma soo i nofoaga faigata, o le mafai foi lea ona aveia ma soo, i soo se mea.

Oketopa 06 – 12 2019.

Tusi Faitau: Salamo 77: 7 – 9: 14.
Manatu Autu: Masalosalovale ma faatuatua.

Fa’afetai

Ona o lana mealofa o le faatuatua, ua avea ai i tatou ma e mulimuli ia te Ia, auā e moomia e tagata uma le manumalo.

Ona o lona liliuina o o tatou loto masalosalo, e avea ma nofoaga e mausali ai le faatuatua.

Ona e susulu mai pea lona malamalama, ma faamalosia ai o tatou tagata, ina ia tumau le faamaoni ia te Ia.

Ona o lona Alo pele o Iesu Keriso, o Lē ua fetalai, Amuia e lē vaai mai, ae faatuatua mai pea.

Fa’atoeseaga

Ona ua tatou faalogo i le Talalelei o lona alofa, a e taotaomia lava i tatou i le masalovale, ma fesiligia ai le moni o lona faatasi mai.

Ona e i ai itu aso, e itiiti ai lo tatou faatuatua, pea a feagai ma faigata ma tiga, o le ola nei.

Ona o le manino o le valaau mai o le Atua, ia tatou ola faatuatua, peitai ua tatou tuu faatasi, ma le ola lē mautonu ma le masalosalovale.

Mana’oga

Ina ia foai mai e le Agaga o le Alii, le atoatoa o lo tatou mautinoa, tatou te faapea ane ai i le faatuatua, matou te tuuina atu lo matou ola i ou aao, ete pule ai.

Ina ia faamalosia e lona mana lo tatou faatuatua, tatou te tu poupu ai e tetee atu, i matagi o le fenunia’i ma le masalosalovale, ua siomia ai i tatou.

Ina ia taitaiina pea i tatou e le Agaga o le Atua, e tumau ai pea le avea o Iesu Keriso, lo tatou Aliima le Faaola, e fai ma totonugalemu, o lo tatou ola faatuatua.

Oketopa 13 - 19 2019.

Tusi Faitau: Luka 15: 17 – 24.
Manatu Autu: O le Alofa e le uma.

Fa'afetai

Ona o lona faailoa mai, o le alofa e lē uma, e ala i le soifua atoatoa o Iesu Keriso, sa faasatauroina ma tanumia, ae sa toe tu manumalo, e faaola le Tagata agasala.

Ona ua savalia e Iesu le ala tatou te ui ai, ina ia olaola pea lona finagalo I o tatou loto, o le faamagalo agalelei, ma le alofa.

Ona o le Alii le Atua o Ia o le ola, o Lē soifua pea, o lona alofa e le uma e oo i le manuia e faavavau, mo tagata uma e talitonu ma faatuatua ia te Ia.

Fa'atoesea

Ona o le faapito o lo tatou alofa, ua le oo atu ai lona malosi i ē tatou te tuaoi, ina ua tatou le ola i aoaoga a le Alii Faaola, Ia alofa atu i le Alii lou Atua ma lou loto atoa lou agaga atoa, ma lou malosi atoa.

Ona o le vave ona faapogisaina lo tatou alofa, pe a ulufale mai le ita ma le fia tau ma sui, io tatou loto.

Ona tatou te alalaga ma tautau le alofa, e le uma o lo tatou Alii Faaola i aso uma, ae augapiu mani fua e aliali ma susulu mai, i le faatinoga o a tatou feau ma galuega.

Mana'oga

Ina ia aumai mo i tatou le malosi, onosai ma le faatuatua, tatou te malaga ai ma le mautinoa, i le ala o le alofa e le mavae, ua Ia faasino mai e tau atu i le satauro.

Ina ia faatumauiua io tatou loto le alofa, tatou te tetee atu ai i uiga o le lalolagi, e faaleagaina ai i tatou.

Ina ia atagia pea le soifuaga o Keriso, ma lona alofa io tatou olaga, tatou te lavatia ai mea faigata uma e tutupu mai, ma fua tele mai ai pea lo tatou ola, i lona finagalo paia.

Oketopa 20 – 26 2019.

Tusi Faitau: Roma 3: 19 – 26.
Manatu Autu: O le saolotoga moni.

Faafetai

Ona o le saolotoga o le Talalelei, ua maua ai lo tatou avanoa, e faafetaia'i ai manaoga o lenei soifuaga.

Ona ua le o saisaitia i tatou, i tulafono poo tu ma aga, a ua tatou saoloto e momoli lona faamaoni i tagata uma, ma taimi uma, ma nofoaga uma.

Ona ua Ia faatagaina i tatou, e ala i lona alofa tunoa, sei faafouina lo tatou ola, ina ia atagia i mea uma tatou te faia, lona faamaoni ma le alofa mutimutivale.

Faatoesega

Ona o le lē atoatoa ona taliaina, o le faamaoni o le Atua e o tatou tagata, ua popogi ai lo tatou vaai, i le saolotoga sa tatau ona i ai.

Ona ua tatou naunau e saili, i malosi eseese o le lalolagi, ni auala tatou te saoloto ai, ae faatuatuaana'i Iesu Keriso le Alii ma le Faaola, o Ia lava o le faitotoa o le saolotoga moni.

Ona tatoute fia saoloto, ae saisaitia lava i tatou e le fili, io tatou vaivaiga ma tuinanauga faaletagata.

Manaoga

Ina ia faamafanafanaina pea i tatou i le saolotoga moni, na Ia folafolaina mai e ala ia Iesu Keriso.

Ina ia tauave e le Alii a tatou avega, aua e avegofie lana amo, o lana avega foi e mama ia, ina ia tatou saoloto mai ai i le agasala, ma ola ai i lona alofa tunoa.

Ina ia faaosofia ma galueaina e le mana o le Atua, le ekalesia ma o tatou tagata uma, ina ia ave le tatou faamuamua, i le ala o le saolotoga moni na faataitai mai e Keriso, e faatino ai lo tatou valaauina.

Oketopa 27 – Novema 02 2019.

Tusi Faitau: Mareko 10: 17 – 24.

Manatu Autu: O le tiapolo na mafua ai ona ou faia.

Faafetai

Ona o Ia lava na motusia filifili o le agasala, sa saisaitia ai i tatou i le pologa, ona o le tiapolo ma ana faaosoosoga.

Ona o le maliu o lona Alo pele e toatasi, ua tatou saoloto ai e avea mona atalii ma afafine, ma sulii o lona malo.

Ona o Ia o Lē agalelei, sa tamaoaiga a ua mativa, ona o i tatou.

Ona o Ia lava o le Alii o le Ola.

Faatoesega

Ona ua tatou gausia ana folafolaga, ma faatino lo tatou lē ususitai i lona fetalai mai, i mea tatou te manuia ai.

Ona sa ia faia i tatou ina ia saoloto, a ua tatou filifili e avea ma pologa a le agasala.

Ona ua nutinini'iina lo tatou faamoemoe, ina ua tatou tuuaifuaina le tiapolo, ao i tatou lava le faapogai, ina ua sese le tatou faamuamua.

Manaoga

Ina ia fesoasoani mai lona Agaga, e mafai ai ona tatou tali atu ma le loto tele, e fai le mea ua Ia finagalo i ai, aua o lo tatou manuia foi lea.

Ina ia ofoina mai pea e le Atua, le avanoa ma le mafai, tatou te ola ai i se fesootaiga, mafanafana faaleagaga ma Ia, i taimi ma aso uma o lo tatou ola.

Ina ia lē tineia lava le faamoemoe, o soo se tagata talitonu ma ua salamo faamaoni, a ia vaai ae pea i le satauro o le manumalo, e fai ma faatupu malosii ia te ia, i aso uma e le aunoa.

Novema 03 – 09 2019.

Tusi Faitau: Efeso 4: 1 – 6.

Manatu Autu: Savali a le tagata faatuatua ua tauaogaina.

Faafetai

Ona o le faaolataga e ala ia Iesu Keriso, mai le Atua mo i tatou, ua ta'uaogaina ai lo tatou faatauvaa, i ala i feau ma valaauina eseese.

Ona o le mana o le Agaga Paia e ta'ita'iina ai la tatou savali ma fa'atonu folau ai o tatou ala i le Atua.

Ona o taiala mautinoa, mo i tatou ma a tatou fanau, i le manuia ma le ola e faavavau.

Faatoesega

Ona o i tatou lava o tagata, e le atoatoa i le tele o taimi, ua le faamaoni ai le tatou savali, i le faasinoga a le Agaga o le Atua.

Ona ua tausolomua i tatou o tagata o le ekalesia, ona femoumoua'i le ola faatuatua, ua tautevateva ai le tatou savali, ma vaemanua ai lo tatou avea ma Kerisiano.

Ona e gata lava lo tatou savali i le faatuatua, i taimi o le sologa lelei, a e a tatou fetaia'i loa ma faigata ma puapuaga o le olaga, ona tatou le mautonu loa lea.

Manaoga

Ina ia avea i tatou uma o tagata o le ekalesia, e savavali ma le faamaoni ma le lē faalogologotiga, i le faatinoga o lo tatou valaauina.

Ina ia fai i tatou uma ma molimau ola, o le faaolataga a le Atua, e maua ai e tagata uma le ola e faavavau.

Ina ia maua e le ekalesia ma i tatou uma, le loto e tasi ma le agaga e tasi, e faatino ai a tatou feau ma galuega, faapei ona valaauina ai i tatou e faima itutino, o le tino paia o Keriso.

Novema 10 – 16 2019.

Tusi Faitau: Esoto 4: 1 – 8.

Manatu Autu: Ave i le Atua mea uma ua Ia foai ia te oe

Faafetai

Ona a toe tepa i tele o tausaga ua mavae, i le auau o maa i le mativa, ma le le tagolima i le tauatinaeina, ae uale masino le anoanoa'i, o le sosia ma le tamaoaiga o le Atua i nei ona po,ua liligi ma sasaa mai io tou aao, ma o matou lima.

Ona e ui ina tatou soli pea tulafono ma poloaiga a le Atua, ae o loo liligi faavai mai pea ana faamanuiaga, mo i tatou i aso uma.

Ona o le Taulaga e ala i lona Alo pele, o le foai na ofoina uma mai ma le atoatoa, mo tagata uma.

Faatoesega

Ona ua tatou fialia e ole ma tatalo i le Atua, ma lona alofa sasaa mai, ae tatou te augatata e toe foai atu mo le Atua, ina ia ola ai isi.

Ona ua fai ma a tatou mea fialia,le foai i le Atua i le tele o taimi, e saili ai so tatou lava viiga.

Ona ua tatou mananao na o le talia, ae faigata tele ona tatou faailoa atu, lo tatou alofa i le Atua atoa ma tagata.

Manaoga

Ina ia faamaite mai e le Agaga o le Atua, lō tatou ola alolofa le faatuaoaia, i le atinaeina o lana ekalesia aoao, atoa ma tagata matitiva ma le le tagolima.

Ina ia faaosofia tagata uma e le Agaga o le Atua, e fai taulaga ma le fialia mo le loto malie, ona mautinoa lea o le fia silasila mai o le Alii, ma faamuina a tatou faiga taulaga.

Ina ia manino ma iloa e tagata uma, ona foai le mea aupito sili mo le Atua, i mea ua Ia foai mai io tou aao ma o matou lima.

Novema 17 – 23 2019.

Tusi Faitau: Sakaria 4: 4 – 9.

Manatu Autu: O le Agaga o le Atua na te faia suiga lelei.

Faafetai

Ona o mealofa foai fuaina mai e le Atua mo i tatou, e faatamaoagaina ai o tatou tagata i taimi uma, aemaise lava i taimi e le taugamalie ai, le tatou malaga o le ola nei.

Ona e ui ina le masino, mea fai o lo tatou ola valaauina i soo se ala, ae o loo i ai pea suiga matamata tetele lelei, e avagalima ai le tautua a lana fanau.

Ona o le suiga tele, na saunia e Iesu i lona alofa ma le agalelei, ua suia ai lo tatou toilalo i le agasala ma le amioleaga, e avea ma tagata faaolaina, pe a faamaoni lo tatou lagonaina o le loto salamo.

Faatoesega

Ona ua tatou faalagolago, le malosi ma le tamaoaiga ua tatou maua, ua galo ai le Atua ma le musumusua mai o lona Agaga Paia.

Ona ua faigata ona toe fuataiina o tatou loto, ua tatou le lagona ai le finagalo o le Atua mo i tatou.

Ona ua faigofie ona tatou gaua'i i le tiapolo ma ana faaosoosoga, ona o le tu'inanau o o tatou loto, e faamalie o tatou tu'inanauga

Manaoga

Ina ia mafai ona tatou lagonaina, le musumusuga a le Agaga o le Atua, na te faamalosiau i tatou e tetele atu, i le lalolagi ma lona matalasi.

Ina ia avea i tatou ma soo moni o le Alii, tatou te faailoa atu i taimi uma fua o le Agaga Paia, e faatupu tele ai le ola faatuatua, o le fanau a le Atua.

Ina ia avea le Agaga Paia e fai ma tapasa, o le soifua tautua o le Ekalesia ma o tatou tagata uma, e mālīe ai le faafofogaaga a le Atua, ma nanamu lelei ai i ona luma, lo tatou tautiga.

Novema 24 - 30 2019.

Tusi Faitau: Roma 12: 1 – 13.
Manatu Autu: Ia fai i tatou ma auauna.

Faafetai

Ona o le faaogaina oi tatou e le Atua, e fai ma auauna i ala o feau ma valaauina eseese, ua tofofi i ai i tatou.

Ona o le faamaoni pea o le alofa o le Atua, e ui lava ina tatou le faamaoni i lo tatou valaauina.

Ona e ui ina eseese o tatou valaauina, ae tasi lava le faamoemoe ma le naunautaiga, ia fai ma viiga o lo tatou Atua.

Ona o le auala manino o le soifua auauna, na faaalua e Iesu Keriso, e fai ma taiala o lo tatou ola auauna.

Faatoesega

Ona ua faigofie i le tiapolo, ona tosina o tatou loto, ua tatou le faamaoni ai i lo tatou valaauina.

Ona ua avea tulaga tofi ma le faaeaina i agavaa ma tiute, ua tatou manatu mama ai i isi uso a tagata.

Ona o le pupu oo tatou loto i mea e pala o le lalolagi, ua galo ai se avanoa mo le Alii, aemaise o le pogisa o le tatou vaai i le ala o le auauna, ua uma ona faasino mai e Iesu.

Manaoga

Ina ia avea i tatou uma ma auauna aoga ma faatuatua faamaoni, e faalatele ai le Talalelei mo le viiga o le Atua.

Ina ia taitoaluaina i tatou uma ma faaaupogaina e le Atua, mo tatou faiva alofilima, tatou te faaailoa ma faaali atu ai lona mamalu ma le silisiliese, io tatou tagata faatauvaa.

Ina ia avea ala o a tatou feau ma faigataulaga, e mu ma manogi lelei i luma o le Atua, ona tatou faapea ifo lea, oi tatou lava o auauna le aoga ma le faatauvaa, a ia tuuina atu le viiga i le Alii.

Tesema 01 – 07 2019.

Tusi Faitau: Iosua 24: 14 – 28.

Manatu Autu: Faasili foe mo le a’e.

Faafetai

Ona o lo o fa’as-aogalemuina pea e aao alofa o le Atua, le tatou faiga malaga o lenei foi tausaga.

Ona o le laveaiina oi tatou, mai le tele o puapuaga ma faigata o le ala, i le a’e mauga ma le ifo vanu, ma le louloua o le tau ma le sousou o le vasa.

Ona ua a’e malo foi le tele o faamoemoega, sa feagai ai ma o tatou tagata, ona o le una’i ma le faamalosiau mai o le Agaga o le Atua, i taimi e vaivai ai lo tatou ola taumafai.

Faatoesega

Ona o lo tatou ola fia malosi ma faamaualuga, ua taotaomia ai le tele oa tatou galuega ma taumafaiga lelei, i aso uma o lo tatou ola.

Ona o le tosina gofie o o tatou loto, i mea mea vaivai o le olaga, ua afua ai ona tatou toilalo ma faiaina pea, i luma o le Alii.

Ona ua tatou faagalo pea le Atua, i lo tatou ola i aso uma, ua sese ai pea a tatou filifiliga, i totonu o aiga nuu ekalesia, tainane le malo ma le atunuu.

Manaoga

Ina ia fesoasoani mai le Agaga o le Atua, e faamalosia o tatou loto ma faamoemoega ia te Ia, ina ia tumau pea le faamaoni ma le mafanafana, oa tatou tapuaiga i ona luma, i aso uma e le aunoa.

Ina ia alofa mai le Atua, ma taofiofi mauio tatou tagata, mai le avaga gofie atu i mea faafiafia ma faaososoga leaga, o le faaiuga o lenei foi tausaga.

Ina ia faamalosia i tatou uma, ma le ekalesia e le mana o le Alii, e taula ma taula’i atu pea, le tatou vaai ia te Ia, i aso uma o totoe o lo tatou ola.

Tesema 08 – 14 2019.**Tusi Faitau: II Timoteo 4: 6 – 8.****Manatu Autu: E suamalie le taunuuga manuia o tauiviga.****Faafetai**

Ona o lona alofa ma lona faamaoni, ua sao ma uli ai fa'amoemoega ma tauiviga uma, o lenei tausaga.

Ona ua fa'aalia pea le alofa o le Atua i a tatou fanau, i a latou tausinioga, aoaoga ma taaloga, ma a latou feau ma galuega.

Ona o le a'e manuia lava foi lea, o le tapuaiga a matua ma latou aiuliuliga, sa faatinoina ai lo latou titifaitama, ma ua mautinoa ai foi, o le tausinioga faa-Kerisiano, e i ai lona pale o le amiotonu, ua teuina mo i latou uma o e faamaoni i le Alii.

Faatoesega

Ona ua tele ina faigata ona tau faavasega, o tatou loto ma mafaufau, i mea e tatau ma mea e le tatau ona fai.

Ona o lo tatou tuufesili pea, i mea e tau faamalie ai o tatou lagona ma tu'inanauga faaletagata, ae galo ai le tausinioga mo le Alii.

Ona e tele a tatou upu ma tala, e ufiufi ai le mea moni i luma o tagata, ae galo ai ia te i tatou, oa tatou amioga leaga uma, e pei o le ao i le silafaga a lo tatou Tama oi le lagi.

Manaoga

Ina ia mafai ona tatou galulue ma le mautinoa, ua saunia lava e le le Atua le tau, I soo se galuega ma tausinioga e faia mo Ia.

Ina ia aua tatou te faavaivai, e tuuina atu ma faafoi le viiga i le Atua, ina ua Ia tali mai e tusa ma le tuuina atu, oa tatou fanau i aoaoga, faapea foi a tatou feau ma galuega o lenei tausaga.

Ina ia alofa mai le Atua, ma faamalosi mai io tatou loto mafaufau ma agaga, e mafai ai ona tatou tausinio ma le atoatoa, e atiina a'e lana ekalesia i lenei lalolagi, ma faaalua ai pea le faamaoni o lo tatou tali atu, i lona valaau mai.

Tesema 15 – 21 2019.**Tusi Faitau: Luka I: 46 – 55.****Manatu Autu: O le olioli o le amanaiaina.****Faafetai**

Ona o le Tamā oi le lagi, aua o ai ea le tagata ua Ia manatu mai ai, ma le atalii o le tagata ua asiasi mai ai, ma lona amanaiaina oo tatou tagata faatauavaa i lona alofa, atoa ai ma le faaaogaina oi tatou i ana feau ma galuega.

Ona ua le amanaiaina e le Atua, o tatou vaivaiga ma le leiloa o se mea, tainane lo tatou le tauoloa, i totonu o le sosaiete o tagata faasausili ma le faamaualuluga.

Ona o le alofa le faatuaioia o le Atua, ua Ia totoina ai pea le olioli ma le fiafia io tatou loto, e fai ma faamalosiua io tatou tagata, i faiva ma tiute o tatou feagai ai.

Faatoesega

Ona o lo tatou le mataala i le tele o taimi, ma lo tatou ola le tapenapena, ua afua ai le faateia gofie oi tatou, ma tupu ai lo tatou le mautonu ma le fememea'i, pe a valaau mai le Atua.

Ona ua tausolomua lava i tatou, ona tuu o tatou tagata i lalo, ua maua ai le avanoa o le tiapolo e tafilisaunoa ai i lo tatou ola.

Ona ua matele ina tatou lalafi ona o lo tatou palaaai i tagata ma le lalolagi, matatou ola ai lava i se olaga e pumoomoo ma pogisa.

Manaoga

Ina ia faatupuina pea e le mana o le Atua, lo tatou fiafia e tapuai ma faafoi atu le viiga i lona suafa, atoa ma le faafetai ma le faamanu, pe a faaeaina i tatou i soo se mea.

Ina ia manino pea i le tatou faaloga, le valaau mai o le Atua i soo se taimi e finagalo ai, ma ia tatou sauniuni ma tapenapena, aua tatou te leiloa le taimi, e faaali mai ai o Ia.

Ina ia tatou talia ma le agaga fiafia lo tatou valaauina, aua foi nei o tatou masalosalo, i le uiga o lona valaau mai ia te i tatou.

Tesema 22 – 28, 2019.**Tusi Faitau: II Tupu 4: 8 – 17.****Manatu Autu: O le mafanafana o le mafutaga.****Faafetai**

Ona o lenei vaiatau o aso fiafia, o taimi lava o mafutaga faaleaiga, e fai malologa mai ai le aufaigaluega ma ē taumamao, aemaise lava o ē tatou te va i vasa i le tausaga atoa, ona o nofoaga.

Ona o le vaiatau foi lenei ua faatino ai, ni isi o faatasiga a aiga potopoto, e faamanatu ai gafa ma sootaga, aemaise o le faailoa o tupuaga o aiga, ma ona tupulaga.

Ona o lea foi ua tatou faamanatuina i lenei vaiatau, le meaalofo silisili a le Atua, mo le faaolaina oo tatou tagata agasala, ia fai lea ma faatupu malosi, i lo tatou faatauaina o le agaga o le fai meaalofo, i totonu oo tatou aiga nuu ma ekalesia.

Faatoesega

Ona o le faigata tele i ni isi oi tatou, ona lagona le agaga fia mafuta i totonu o aiga nuu maekalesia, ona o le faataua o manaoga ma tuinanauga faaletagata, ua sese ai ona tatou faaogaina lenei vaiatau, e saili ai mea faafiafia, e le tusa ai ma le faakerisiano.

Ona ua faaitiitia lo tatou lagona o le fia fai meaalofo, ona ua taitaiina o tatou loto, e faaosoosoga ale alii o le lalolagi.

Ona o loo i ai pea o tatou lagona, o le masalosalo i le Agaga fai meaalofo o le Atua, e pei ona auina mai ai lona Alo pele i le lalolagi, ina ia le fano se tasi e faatuatua ia te Ia, a ia maua le ola e faavavau.

Manaoga

Ina ia tatou maua uma le agaga tali malo ma le fai meaalofo, tusa lava poo le a le tulaga o le tatou tamaoiaiga, ma foliga o tagata e faaali mai.

Ina ia aua tatou te masalosalo i meaalofo, ua ofoina mai e tagata ona o lo tatou alolofa atu, a ia tatou talia ma le agaga fiafia, e fai ma faamanatu o le fanau mai o le Alii, o le meaalofo sili mai le Atua mo i tatou.

Ina ia faatauaina pea lo tatou sootaga, i le toto ivi ma aano faapea maisi uso a tagata, inaia tatou fiafia e mafuta ma fai meaalofo, aua o le faailoga lea o lo tatou olaina, o le alofa le faatuaioia o le Atua, e pei ona aoao mai e Iesu.

Tesema 29 2019 - Ianuari 04 2020.

Tusi Faitau: Mataio 4: 18 – 22.

Manatu Autu: Ia talia suiga.

Faafetai

Ona o suiga o aso ma tausaga, ma le gasologa o minute ma itula o lo tatou olaga, o avanoa lelei uma ia ua aumai e le Atua, tatou te faaaogaina e toe faaleleia atili ai le tatou tautua, mo Ia ma lona finagalo.

Ona o le amanaiaina oi tatou e le Atua, ua Ia faaaogaina ai o tatou tomai ma agavaa, e faatinoina ai lona finagalo paia i le lalolagi.

Ona o suiga uma, e faia e le Atua i lo tou soifua ma so matou ola, e fai faatatau lava ina ia laina tutusa, ma le malolosi o faafitauli o faigata ma puapuaga, e siomia ai lo tatou ola.

Faatoesega

Ona o lo tatou faalolololo pea, i ituaiga olaga ua tatou fiafia i ai, ua faigata ai lava ona tatou talia ni suiga fou, e tatau mo i tatou.

Ona ua aliali pealo tatou fefefe ini suiga fou, ua faasisi solo ai fua a tatou upu, ae ona o le pu moomoo oo tatou siomiaga, ma lo tatou tetee lava i le valaau mai o le Matai.

Ona ua matagofie suiga ua faia e le Atua, mo so tatou manuia ma a tatou fanau, ae paga lea ua faigata ona suia ai o tatou tagata, ona ua suamalie le paie ma le faapouluulu.

Manaoga

Ina ia fesoasoani mai le Agaga, ina ia mafai ona faaiuina ma le manuia lenei tausaga ma ona lavasiga, ma ia tatou aulia atu lena tausaga i lona manuia.

Ina ia saunia uma i tatou ma le ekalesia, e talia ni suiga fou, o le a tatou fetaia'i i lena foi tausaga, o lumanai nei.

Ina ia tatou nofo sauni foi i taimi uma, e talia ma le fiafia le valaau mai o le Atua, e suia o tatou faiva e masani ai, ae fai faiva mo tagata, ma fausia o latou agaga, mo le Atua ma lona malo.

E tali faaaliali mai pea le Leoleo Sili, i le tatalo e faia ma le faatuatua faamaoni.

AMENE